



TAJUK KHUTBAH JUMAAT

Siri: 43/2023

MEMELIHARA DIRI DARI DOSA

27 Oktober 2023

Bersamaan

12 Rabiul Akhir 1445

**DIKELUARKAN OLEH:
JABATAN HAL EHWAL AGAMA
TERENGGANU**

PERINGATAN:

Adalah diingatkan bahawa sebarang penambahan dan pemindaan terhadap isi kandungan teks khutbah yang telah disediakan oleh Jabatan Hal Ehwal Agama Terengganu adalah **DILARANG**.

Khatib yang bertugas hendaklah menyemak kembali **RUKUN, AYAT AL-QURAN** dan helaian muka surat yang diterima. Pastikan teks dibaca terlebih dahulu sebelum menyampaikan khutbah.

KHUTBAH PERTAMA

الْحَمْدُ لِلَّهِ غَافِرِ الذَّنْبِ وَقَابِلِ التَّوْبِ شَدِيدِ الْعِقَابِ،
وَأَشْهَدُ أَنْ لَا إِلَهَ إِلَّا اللَّهُ الْحَلِيمُ التَّوَّابُ،
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ الْمَبْعُوثُ رَحْمَةً لِلْعَالَمِينَ،
اللَّهُمَّ صَلِّ وَسَلِّمْ وَبَارِكْ عَلَى نَبِيِّنَا مُحَمَّدٍ وَعَلَى آلِهِ وَصَحْبِهِ أَجْمَعِينَ،
أَمَّا بَعْدُ: فَيَا عِبَادَ اللَّهِ، اتَّقُوا اللَّهَ الَّذِي تَسَاءَلُونَ بِهِ وَالْأَرْحَامَ،
إِنَّ اللَّهَ كَانَ عَلَيْكُمْ رَقِيبًا.

Ikhwaniyal Muslimin,

Saya menasihati diri saya sendiri dan sidang Jamaah sekalian agar kita berusaha meningkatkan ketaqwaan kepada Allah SWT dengan penuh keyakinan dan keikhlasan dalam melaksanakan segala suruhanNya dan menjauhi segala laranganNya. Mudah-mudahan kehidupan kita terus dibimbing olehNya, dikurniakan rahmat dan dimasukkan ke dalam syurgaNya kelak. Mimbar pada hari Jumaat yang bertuah ini akan memperkatakan khutbah yang bertajuk:

MEMELIHARA DIRI DARI DOSA

Hadirin Jumaat yang dikasihi sekalian,

Antara sifat manusia adalah mudah leka dan alpa sehingga melakukan perbuatan-perbuatan yang melanggar hukum Allah SWT.

Sebagai umat Islam, kita telah diajar dan dididik untuk sentiasa memelihara diri dan memantapkan iman supaya menjadi orang yang benar-benar bertaqwa dan mentaati perintah Allah.

Allah telah menjelaskan melalui ayatnya dalam al-Quran berkaitan azab terhadap orang yang melakukan perbuatan dosa dan ma'siat. Malangnya, masih ada juga di antara kita yang terus melakukan perbuatan munkar dan ma'siat dengan sengaja bahkan ada yang melakukannya secara terang-terangan.

Kita sebagai orang Islam sewajarnya sedar bahawa semua perbuatan buruk kita bakal diadili oleh Allah SWT di Akhirat nanti.

Firman Allah SWT dalam surah al-Zalzalah, ayat 8 :

وَمَنْ يَعْمَلْ مِثْقَالَ ذَرَّةٍ شَرًّا يَرَهُ ﴿٨﴾

Maksudnya: Dan sesiapa berbuat kejahatan seberat zarrah, nescaya akan dilihatnya (dalam surat amalnya).

Muslimin yang dikasihi sekalian,

Janganlah kita lupa bahawa hasil pendapatan dari sumber yang haram, boleh mengakibatkan penderitaan ke atas diri sendiri dan ahli keluarga kerana setiap suap dari sumber yang haram, maka api nerakalah balasannya. Sabda Rasulullah SAW:

كُلُّ لَحْمٍ نَبَتَ مِنْ سُحْتٍ فَالنَّارُ أَوْلَىٰ بِهِ

Maksudnya: Setiap daging yang tumbuh daripada perkara yang haram, maka neraka lebih layak baginya.

(Hadis riwayat at-Thobaroni)

Sebagai contoh; pelaku rasuah, penyalahgunaan kuasa, pengamal riba atau penipu dalam perniagaannya, walaupun mereka mendapat keuntungan wang ringgit, harta melimpah, hidup mewah, perbuatannya tidak diketahui dan terlepas dari tindakan pihak berkuasa, namun balasan akibat perbuatan dosanya tetap ada.

Muslimin yang dikasihi sekalian,

Seseorang yang melakukan ma'siat atau dosa diwajibkan bertaubat kepada Allah SWT dengan segera. Ia adalah bagi mengelakkan diri dari ditimpa azab kemurkaan Allah SWT lantaran dosa yang telah dilakukan.

Ketahui bahawa taubat atau kembali patuh kepada Allah SWT mempunyai beberapa syarat dan peraturan. Ia telah dijelaskan oleh para Ulama Islam di dalam karangan mereka. Antara syarat tersebut adalah :

- i. Seseorang yang telah melakukan kesalahan dosa hendaklah menyesal di atas perbuatan berkenaan dan bertekad tidak akan mengulanginya lagi,
- ii. mengucapkan istighfar (permohonan ampun) di atas dosa kesalahan itu,
- iii. memperbaiki perbuatan dan tingkahlaku supaya ia dapat menghapuskan kesan kesalahan yang telah dibuat,
- iv. mengembalikan hak dan milik orang yang dibuat kesalahan terhadapnya, di samping meminta kemaafan darinya.

Justeru, marilah sama-sama kita menghayati sabda Baginda Nabi SAW:

إِنَّ اللَّهَ يَقْبَلُ تَوْبَةَ الْعَبْدِ مَا لَمْ يُغْرَعِرْ

Maksudnya: Sesungguhnya Allah SWT (bersedia) menerima taubat dari seseorang hamba selama mana nyawanya belum berada di kerongkongnya.

(Hadis riwayat at-Tirmizi)

Muslimin yang dirahmati Allah,

Marilah kita berusaha mengawal dan memelihara diri daripada perkara-perkara yang boleh menyebabkan berlakunya maksiat dan dosa. Antara kaedah dan cara terbaik ialah;

Pertama: Sentiasa merasakan muraqabah Allah SWT (iaitu kita diawasi dan diperhatikan) olehNya, Yang Maha Mendengar lagi Maha Melihat,

Kedua: mengingatkan diri tentang nikmat-nikmat yang telah dikurniakan oleh Allah SWT kepada kita seperti nikmat tubuh badan, nikmat sihat, nikmat hidup, nikmat rezeki dan sebagainya. Apakah setelah kita menikmati pelbagai

anugerah tersebut, adakah wajar bagi kita melakukan penderhakaan kepada Allah SWT dan tidak bersyukur kepadaNya?

Ketiga: memperbanyakkan ingat kepada kematian kerana ia sahajalah pemutus segala keinginan hawa nafsu dan syahwat haiwaniah.

Keempat: menginsafi bahawa kehidupan di dunia ini hanyalah sementara dan masa untuk mengabdikan diri kepada Allah SWT, manakala yang kekal abadi ialah kehidupan di akhirat kelak, di mana setiap kita akan diadili di hadapan Allah SWT.

Muslimin yang dirahmati Allah,

Kesimpulan khutbah pada hari ini, kita perlu berusaha untuk menjadikan diri sebagai hamba Allah yang dikasihiNya dengan mentaati segala perintahNya dan menjauhi laranganNya. Di samping sentiasa beristigfar dan berdoa ke hadrat Allah SWT semoga kita sentiasa mendapat pengampunan, perlindungan, barakat dan rahmat daripadaNya. Mohonlah kepadaNya semoga negara kita dipeliharaNya dari sebarang bala bencana, selamat daripada azab seksa dan beroleh keamanan dan kesejahteraan.

Amin Ya Rabbal Alamin.

أَعُوذُ بِاللَّهِ مِنَ الشَّيْطَانِ الرَّجِيمِ

وَمَا أَرْسَلْنَا مِنْ رَّسُولٍ إِلَّا لِيُطَاعَ بِإِذْنِ اللَّهِ وَلَوْ أَنَّهُمْ إِذْ ظَلَمُوا
أَنْفُسَهُمْ جَاءُوكَ فَاسْتَغْفَرُوا اللَّهَ وَأَسْتَغْفَرَ لَهُمُ الرَّسُولُ لَوَجَدُوا اللَّهَ

تَوَّابًا رَحِيمًا ﴿٦٤﴾

Maksudnya: “Tidaklah Kami mengutuskan seorang Rasul pun kecuali supaya dipatuhi dengan izin Allah. Jika mereka menzalimi diri mereka sendiri kemudian mereka datang kepadamu (wahai Nabi), lalu mereka memohon ampun dari Allah dan dipohon keampunan untuk mereka oleh Rasulullah, mereka akan mendapati Allah Maha Penerima taubat dan Maha Penyayang”.

(Surah an-Nisa’ ayat 64)

بَارِكْ اللَّهُ لِي وَلَكُمْ فِي الْقُرْآنِ الْعَظِيمِ،
وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ،
وَتَقَبَّلَ اللَّهُ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ،
أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ،
وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ،
فَاسْتَغْفِرُوهُ، إِنَّهُ هُوَ الْغَفُورُ الرَّحِيمُ.

KHUTBAH KEDUA

الْحَمْدُ لِلَّهِ رَبِّ الْعَالَمِينَ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ،
وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ،
وَعَلَى آلِهِ وَأَصْحَابِهِ أَجْمَعِينَ.
أَمَّا بَعْدُ، فَيَا عِبَادَ اللَّهِ! اتَّقُوا اللَّهَ فَقَدْ فَازَ الْمُتَّقُونَ.

Ikhwaniyal muslimin,

Berbaktilah kepada Allah SWT dengan sepenuh hati. Manfaatkanlah peluang kehidupan ini dengan melakukan ketaatan untuk mendapat keredaan-Nya. Ketahuilah bahawa Allah telah menjadikan hari Jumaat sebagai penghulu segala hari yang dipenuhi dengan pelbagai kelebihan sepertimana sabda Rasulullah SAW yang bermaksud:

”Sebaik-baik hari ialah hari Jumaat. Padanya dijadikan Nabi Adam. Padanya dimasukkan baginda ke syurga dan padanya juga dikeluarkan daripada syurga, dan tidak berlaku Kiamat melainkan pada hari Jumaat.”

(Hadis riwayat Muslim)

Maka bersempena dengan hari yang mulia ini, sayugialah kita umat Islam mengambil peluang melakukan amal kebaikan seperti berniat iktikaf ketika berada dalam masjid, mengambil pengajaran daripada kandungan khutbah Jumaat, berzikir serta menunaikan solat Jumaat dengan tertib dan khusyuk. Janganlah melakukan perkara yang boleh mengganggu jemaah lain sepanjang berada di masjid, kerana perbuatan tersebut dilarang dalam Islam.

Marilah juga kita memperbanyakkan ucapan selawat dan salam kepada Rasulullah SAW sebagaimana firman Allah dalam surah al-Ahzab ayat 56:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

اللَّهُمَّ صَلِّ عَلَى سَيِّدِنَا مُحَمَّدٍ، وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا
إِبْرَاهِيمَ، وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ، وَعَلَى آلِ سَيِّدِنَا
مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ، وَعَلَى آلِ سَيِّدِنَا إِبْرَاهِيمَ فِي الْعَالَمِينَ،
إِنَّكَ حَمِيدٌ مُجِيدٌ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ
وَالْأَمْوَاتِ، إِنَّكَ سَمِيعٌ قَرِيبٌ مُجِيبُ الدَّعَوَاتِ.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْفَحْشَاءَ مَا لَا يَصْرِفُهُ غَيْرُكَ.

اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنَ السَّيِّئِ الْأَسْقَامِ. اللَّهُمَّ اشْفِ
مَرْضَانَا وَارْحَمْ مَوْتَانَا، وَالطُّفْ بِنَا فِيمَا نَزَلَ بِنَا.

اللَّهُمَّ احْفَظْ مَوْلَانَا الْوَاتِقَ بِاللَّهِ السُّلْطَانَ مِيزَانَ زَيْنِ الْعَابِدِينَ، ابْنَ الْمَرْحُومِ
السُّلْطَانِ مُحَمَّدِ الْمُكْتَفِيِّ بِاللَّهِ شَاهٍ، وَأَنْزِلِ الرَّحْمَةَ عَلَيْهِ وَعَلَى السُّلْطَانَةِ نُورِ
زَاهِرَةَ، سُلْطَانَةَ تَرَغْكَانُو.

وَاحْفَظْ أَوْلَادَهُ وَأَهْلَهُ وَرِعَايَاهُ مِنَ الْمُسْلِمِينَ وَالْمُسْلِمَاتِ فِي الدُّنْيَا وَالْآخِرَةِ،
بِرَحْمَتِكَ يَا أَرْحَمَ الرَّاحِمِينَ.

اللَّهُمَّ احْفَظْ وَلِيَّ الْعَهْدِ تَعَكُّو مُحَمَّدَ إِسْمَاعِيلَ ابْنَ الْوَاتِقِ بِاللَّهِ السُّلْطَانَ مِيزَانَ
زَيْنِ الْعَابِدِينَ.

اللَّهُمَّ اعِزِّ الْإِسْلَامَ وَالْمُسْلِمِينَ، وَأَذِلَّ الْمُعْتَدِينَ الظَّالِمِينَ، وَدَمِّرْ أَعْدَائِكَ أَعْدَاءَ
الدِّينِ، وَأَنْصُرْنَا عَلَيْهِمْ يَا رَبَّ الْعَالَمِينَ. اللَّهُمَّ أَنْصُرْ إِخْوَانَنَا الْمُسْلِمِينَ
وَالْمُجَاهِدِينَ فِي فَلَسْطِينَ وَفِي كُلِّ مَكَانٍ.

Ya Allah, Ya Rahman, Ya Rahim.

Perbaikilah hubungan sesama kami dengan penuh kasih sayang. Limpahkanlah dalam kehidupan keluarga kami ketenangan dan kebahagiaan, Semangat muafakat dalam kejiranan, Para remaja yang teguh iman, tinggi ilmu dan mulia akhlaknya.

Ya Allah,

Kami pohon kehadiran-Mu agar mantapkanlah pegangan kami menurut ajaran Ahli Sunnah Waljamaah dan jadikanlah kami sentiasa istiqamah dalam melaksanakan segala perintah-Mu.

Ya Allah,

Perkukuhkan perpaduan umat Islam di negeri Terengganu. Jadikanlah negeri ini negeri yang aman, maju lagi diberkati. Bukakanlah pintu-pintu rezeki dari segala penjuru. Kurniakanlah kepada kami nikmat kesejahteraan yang berterusan. Jauhkanlah negeri kami ini daripada segala malapetaka, musibah dan apa jua kemurkaan-Mu.

آمين يا الله، يا أرحم الراحمين

رَبَّنَا آتِنَا فِي الدُّنْيَا حَسَنَةً وَفِي الآخِرَةِ حَسَنَةً وَقِنَا عَذَابَ النَّارِ.
وَصَلَّى اللهُ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلَّمَ.
وَالْحَمْدُ لِلَّهِ رَبِّ الْعَالَمِينَ.

عِبَادَ اللهِ!

أذْكُرُوا اللهَ الْعَظِيمَ يَذْكُرْكُمْ، وَاشْكُرُوهُ عَلَى نِعْمِهِ يَزِدْكُمْ،
وَلَذِكْرُ اللهِ أَكْبَرُ، وَاللهُ يَعْلَمُ مَا تَصْنَعُونَ.
□ قُومُوا إِلَى صَلَاتِكُمْ، يَرْحَمْكُمْ اللهُ.